

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 5
Marso 7, 2008
www.philippinerevolution.net

Editorial

Padabdabon ang paghimakas sang pumuluyo agud pukanon ang rehimeng Arroyo

Labaw na ang kaakig kag pagsikway sang pumuluyong Pilipino sa rehimeng US-Arroyo. Napuno na gid sila kag nagakaakig sa patung-patong nga mga kaso sang korapsyon kag pagbinutig sang rehimeng Arroyo kag sa sobra sini nga pagpaantos kag pagpamigos sa ila.

Nagadasig ang kumpas kag paglapad sang kahublagang protesta sa bilog nga pungsod. Umpisa sa mga nagapadaku nga rali nga ginlunsar sa Makati sadtong Pebrero 15 kag 29, adlaw-adlaw nga nagalapnag sa nasyunal nga kabisera kag sa nagkalain-lain nga bahin sang pungsod ang pagbuhos sang kolektibo nga kaakig sang pumuluyo. Ang mga ini patimaan sang mabaskog nga pagsikway sang pumuluyong Pilipino sa rehimeng US-Arroyo kag kahandaan nila nga baktason ang dalan sang militante nga paghulag para tapuson ang ginakangil-aran nila nga rehimen.

Samtang nagaibwal ang kahublagang protesta sa bug-os nga pungsod, nagadamu ang nagatuhaw nga mga kagarukan, kabutigan kag kapintas sang nagaharing rehimen. Luwas sa pagkabuyagyag sang anomalya sa proyektong NBN-ZTE, nahayag man sining uli-

hi ang antinasyunal nga kasugtanan nga ginsudlan sang rehimen nga pagtugot sa China sang eksplorasyon sang langis sa Spratlay Islands kabaylo sang bilyon nga pautang. Antes ini, nahayag na ang patungpatong nga kaso sang korapsyon, lakip ang mga ginpangawat sang pamilya Arroyo halin sa proyektong IMPSA-Caliraya, Macapagal Boulevard kag madamu nga iban pa.



***Mga tampok
sa isyu nga ini...***

**Nagabuwelo nga mga
protesta**

PAHINA 3

Nagapalak si Arroyo

PAHINA 4

**Ambus sa Samar
kag Davao, reyds
sa Negros**

PAHINA 7

Indi na mabatas sang pumuluyo ang nagagrabe nga kaimulon kag pagkawad-on. Maathag sa ila nga ang nagapalala nga kaimulon direkta nga ginadulot sang korapsyon sang rehimeng Arroyo. Ang labi nga pag-us-os sang pangabuhian sang malapad nga masa sang pumuluyo indi na matakpan sang mga peke nga estadistika kag pagpaguwa sang rehimen nga nagauswag ang ekonomya. Labi nga nangin maathag ang kaangtanan sang dugang nga pag-antos kag kapigusan sang pumuluyo sa nagatuhaw subong nga mga baho kag kagarukan sang rehimen.

Pilit nga ginatago sang rehimen ang mga makasiligni nga krimen sini paagi sa wala-tuo nga pagtorse sang layi, paglubid sang mga kabutigan, pagpamigos sa masmidya, kag nagkalain-lain pa nga mahigko nga maniobra kag pasista nga pamaagi. Sa pihak sini, labing pursigido ang nagkalain-lain nga sektor—mga organisasyong masa, masmidya, mga tawong-simbahan, negosyante, abugado—nga kalkalon kag ibuyagyag ang kama-tuoran bahin sa mga katontohan kag kagarukan.

Sa desperasyon nga makapa-



ngunypot sa poder, ginpabaskog sang rehimen ang pagpangtapna kag pamasista sa mga nagabato diri kag nagahandum nga mapukan ini. Wala-tuo ang paghimo sang mga ekstrahudisyal nga pagpamatay, pagdukot kag iban pa nga porma sang kalakasan sa mga aktibista, mga kritikal nga tawong-midya kag iban pa nga mabaskog nga pakamalaut sa rehimen. Pati ang mga rali kag iban pa nga ligal kag matawhay nga porma sang protesta ginabalabagan kag ginagamitan sang kusog.

Pero sa pihak sang tanan nga pagpwersa sang rehimen, indi na mapunggan ang nagabalingaso nga kaakig kag pagbato sang nagadaku nga numero sang pumuluyo. Mada-sig nga nagakalayo subong ang kahublagang protesta sa bilog nga pungsod. Nagasunson kag nagapadaku ang nagapadaku ang mga rali

kag labi nga nagalapad ang kubay sang mga nagapanawagan nga patalsikon na ang rehimen.

Kaptan ang nagainit na nga mga protesta kag pagbato sa rehimen sang Arroyo. Lab-uton ang tanan nga bahin sang pungsod kag tanan nga sektor sang pumuluyo. Hingalitan ang tanan nga oras kag kahigayunan para mapasanyog ang pagpukaw kag pag-organisa sa ila. Ipakita ang mabaskog nga angtanay sang mga nagabaga nga isyu sang kagarukan kag pagpangtapna sang rehimen sa ginaantos sang pumuluyo nga mga kabudlayan kag kapigusan sa kada adlaw. Todo-to-do nga manawagan nga pasanyugon ang nagkalain-lain nga pamaagi sang pagbato sa rehimen. Dunganon kag lunsay pabuweluhon ang mga hayag nga pagbato kag ang armado nga paghimakas sa rehimen.

Luto na ang kundisyon para ilunsar ang isa ka bag-o, malapad kag militante nga *people power* batuk sa rehimen sang Arroyo. Hatagan ini sang panibag-o nga kapagsik halin sa mga leksyon nga nakuha sa eksperensya sang mga nagligad nga pag-alsa sang pumuluyo. Himuon nga mas makasaysayan ini paagi sa pagpasanyog diri sang organisadong kusog labi na sang pinakaimol kag pinakapigos nga mga sektor kag pagpainit sang pungsodnon kag demokratikong paghimakas sang pumuluyo. Ubos-kusog kag wala kakapoy nga isulong ang tanan nga paghulag para sa amo nga katuyuan tubtub nga magalap-ta ang kalayo sang mga paghimakas sang pumuluyo sa bug-os nga pungsod.

AB



Tuig XXXIX No. 5 Marso 7, 2008

Ang *Ang Bayan* ginabantala sa lengwahe nga Pilipino, Bisaya, Iloko, Hiligaynon, Waray kag Ingles.

Mahimo ini i-download halin sa *Philippine Revolution Web Central* nga makit-an sa:

www.philippinerevolution.org

Nagabaton ang *Ang Bayan* sang mga kontribusyon sa porma sang mga artikulo kag balita. Ginabuyok man ang mga bumalasa nga magpaabot sang mga saway kag rekomendasyon sa ika-uswag sang aton pahayagan.

Malab-ot kami paagi sa e-mail sa: angbayan@yahoo.com

Kaundan

Editoryal

Padabdabon ang paghimakas sg pumuluyo agud patalsikon ang rehimen **1**

Nagabuwelo nga mga protesta **3**

Nagapalak si Arroyo **4**

Suhulan sa ZTE, labi nga nagahayag **6**

Madinalag-on nga TO

Ambus sa Davao kag Samar, reyds sa Negros **7**

Misengkwentro sg AFP sa Bicol **8**

Kaso sa Sulu, igapasaka sa UN **8**

Balita **9**

Ang *Ang Bayan* ginabantala duha ka beses kada bulan sang Komite Sentral sang Partido Komunista sang Pilipinas

Nagabuwelo ang mga protesta batuk sa rehimeng Arroyo

Nagabuwelo ang kahublagan para sa pagpatalsik kay Gloria Arroyo. Sunud-sunod nga mga paghulag kag pagtilipon ang ginahiwat sang nagkalain-lain nga sektor kag grupo matapos ang madinalag-on nga rali sadtong Pebrero 15 sa Makati. Labi nga nagalapad ang alyansa kontra-Arroyo kag labi nga nangin militante ang ila mga paghulag kag pahayag.

Signipikante ang partisipasyon sang pamatan-on, ilabi na sang mga estudyante sang nagkalain-lain nga mga buluthuan sa Metro Manila. Sa pinakaulihi nga sarbey sang Pulse Asia, tatlo sa apat nga residente sa Metro Manila nagapati kay Jun Lozada kag 76% ang nagpahayag sang wala pagsalig kay Arroyo kag mga puno sang idu-ido niya. Ginaugyunan sang 69% sang mga residente ang mga aksyong protesta para sa pagpahalín sang tanan nga nagapamuno nga upisyal sang gubyerno nga dalahig sa anomalya sang NBN-ZTE kag unkwarto sa ila ang handa magsunod sa mga rali para sipaon sa pwesto si Arroyo.

Daku nga demonstrasyon sa Makati

Masobra 75,000 pumuluyo ang nagtipun-tipon sa isa ka ginatawag *interfaith rally* sa Makati City sining Pebrero 29. Ini na ang pinakadaku nga narekord nga numero sang mga demonstrador nga nagainsister nga magbiya ukon pagpahalín kay Gloria Arroyo halin 2005. Nag-isa sa rali nga ini ang nagkalain-lain nga grupong

relihiyoso, mga eskwelahan, progresibong organisasyon, pulitiko, empleyado, negosyante kag nagkalain-lain nga sektor.

Nanguna sa rali nga ini ang Bagong Alyansang Makabayan (BAYAN) kag mga organisasyon nga kalakip diri, ang Gloria Step Down Movement, Solidarity Philippines, Watch, Pray and Act Movement, Jesus Is Lord Movement, Makati Business Club, Management Association of the Philippines, Integrated Bar of the Philippines, Financial Executives Institute of the Philippines, Black and White Movement, Catholic Educators Association of the Philippines kag iban pa.

Tampok ang pagpasakup sa rali sang mga personalidad pareho nanday anay presidente Corazon Aquino kag Joseph Estrada, anay bise-presidente Teofisto Guingona kag pila ka senador, anay upisyal sang gubyerno kag dalagku nga negosyante pareho ni Manuel Pangilinan sang PLDT.

Separado nga gintamyaw sang Partido Komunista sang Pilipinas kag ni Kaupod Jose Maria Sison, tagapangulo sang International League of Peoples' Struggles, ang madinalag-on nga hublag pro-

testa. Suno kay Sison, mahimo nga mag-ibwal ang panibag-o nga *people power* kon mag-abot sa 100,000-500,000 pumuluyo ang magtilipon agud patalsikon na si Arroyo.

Madinalag-on nga nakatipon ang pila ka pulo kalibo sa Makati sa pihak sang pag-abang sang mga pwersa sang pulis kag militar. Nagtuluhaw ang mga tsekpoynt sa mga dalan pasulod sang Metro Manila agud balabagan ang mga raliyista halin sa Southern Tagalog kag Central Luzon.

Ginpunggan nga magtabuk ang mga raliyista halin sa Southern Tagalog nga lulan sang 11 dyip nga ginpapondo sa San Cristobal, Calamba kag sa Cabuyao, Laguna. Luwas pa ini sa mga myembro sang Kilusang Mayo Uno nga ginabangan sa San Pedro, Laguna. Ginatus-gatos nga estudyante halin sa De La Salle University-Dasmariñas ang wala makalusot sa Cavite. Sa Quezon City, ginabangan ang mga estudyante kag manunudlo sang University of the Philippines-Diliman samtang nagamartsa pakadto sa Makati.

Duha ka katapu naman sang Workers' Assistance Center sa Rosario, Cavite ang gindala sa hedkwarters sang pulisya bangud sa paglunsar sang aksyong protesta.

Protesta sa bug-os nga pungsod

Madinalag-on man nga paghulag ang ginlunsar sa nagkalain-lain nga syudad. Sa Dagupan City, Pangasinan, ginatantya nga 5,000 estudyante, lider sang simbahan kag residente, kag myembro sang IBP ang nagtambong sa misa sa St. John the Evangelist Cathedral nga ginpadayon sa martsa agud manawagan sang pagbiya ni Arroyo sa pwesto.

Sa Pampanga, ginpangunahan ni Gov. Ed Panlilio kag Bishop Roberto Mallari ang "lakad ng pagkakaisa para sa katotohanan" nga gintambungan sang may 500 estudyante. May rali man nga ginhiwat sa Subic, Zambales nga ginpa-



sakupan sang 1,000 residente kag sa Baguio City nga gintambungan sang mga estudyante.

Naglunsar man sang nagkalain-lain nga hublag protesta sa nagakalain-lain nga syudad sang Bicol. Sa Naga City, masobra 2,000 ang nag-angtanay-braso sa isa ka "*human chain*" sa kahabaan sang syudad kag naglunsar sang isa ka *noise barrage*. Sa Sorsogon City, nagrali ang 1,000 katawo sa pagpanguna sang BAYAN kag sang mga grupong simbahan. May paghulag man sa Legaspi City, Daet, Camarines Norte; kag Masbate City.

Sa San Pablo City, Laguna, naglab-ot sa 1,000 pumuluyo ang nakig-isa sa isa ka *prayer vigil*.

Sa Kabisay-an, naglab-ot sa 3,000 halin sa nagkalain-lain nga sektor ang nagkig-isa sa rali sa Bacolod City. Sa Iloilo city, ginabanta nga 1,000 ang nagmartsa sa gintawag n ga "*Walk for Truth and Justice*". Nagpartisipar diri si Archbishop Angel Lagdameo, presidente sang Catholic Bishops Conference of the Philippines. Lima ka gatos nga estudyante kag aktibista naman ang nagrali sa Cebu City. Isa ka porum naman ang ginlunsar

sang mga estudyante sa University of the Philippines, Tacloban City.

Sa Minadanao, nagtambong ang 700 katawo sa rali sa Cagayan de Oro City, upod ang Kamatuoran!, isa ka malapad nga alyansa kontra-Arroyo. Walo ka gatos naman ang nagtipon sa Davao City kag 400 sa Iligan City. Tatlo ka gatos nga estudyante halin sa Mindanao State Universtiy sa General Santos ang nag-*walk out* agud ipakita ang disgusto nila sa rehimen. Sa Cotabato City, naglab-ot sa 200 katawo ang dululungan nga nagsindi sang kandila bilang protesta. Sa una nga kahigayunan, naghiwat sang *noise barrage* ang mga aktibista sa Digos City, Davao del Sur.

Protesta sa iban nga pungsod

Naglunsar man sang mga hublag protesta ang mga migranteng Pilipino sa nagkalain-lain nga bahin sang kalibutan. Kabahin sini ang pagpatuman sang No Remittance Day bilang pangpresyur sa bangkrap nga rehimenng Arroyo nga nagasalig sa binilyun-bilyon nga dolyar nga ginapadala nila.

Sa Hong Kong, ginpamunuan sang UNIFIL-Migrante ang isa ka ra-

li sadtong Pebrero 29. Nagpiket naman ang mga Pilipino sa mga embahada kag konsulada sang Pilipinas sa San Francisco kag Los Angeles, California; Seattle; kag New York City. Nagtilipon sa mga aksyong protesta ang mga migrante sa Ottawa, Winnipeg kag Vancouver. Sa Europe, may paghulag man sa Italy.

Sa Middle East, gindeklarar sang mga migrante nga Day of Action ang Pebrero 29. Sa Sydney, Australia, ginlunsar sang mga migranteng Pilipino ang "*Babay Gloria*" (Bagong Bayani, Ayaw kay Gloria).

Samtang, 61 nga anay myembro sang kabinete halin sa rehimenng Aquino, Ramos kag Estrada, upod ang mga nagbiya na nga myembro sang kabinete ni Arroyo ang nanawagan para sa resignasyon sang mga myembro sang kabinete nga naumid sa mga anomalya bahin sa proyektong NBN-ZTE. Ginhatagan nila ang rehimenng Arroyo sang isa ka simana para magpatuman sang mga reforma batuk sa korapsyon kag kagurangan. Kon magpakatig-a si Arroyo, manawagan man sila para sa pagpataksik. AB

Nagapalak si Arroyo nga salbaron ang kaugalingon

Sobra-sobra ang pagpalak ni Gloria Arroyo agud salbaron ang kaugalingon sa kumunoy nga nahamtangan niya subong. Sa iya desperasyon, labi lamang nga nagakabuyagyag ang iya mga kabutigan kag labi lamang nagatingkad ang pagkahamulag niya sa pumuluyo.

Palaguwaon diri, palaguwaon didto.

Samtang nagalapad ang kahublagan sa pagpataksik kay Arroyo, pilit naman niya nga ginabandera ang sanghakup niya nga tagasuporta. Lakip diri ang mga myembro sang iya kabinete, mga bayaran nga gubernador, kongresista kag mga meyor kag mga upisyal sang militar kag pulisya. Tanan si-



la nakapadipulos sa ulu-andana nga korapsyon sang rehimen.

Pila ka "*solidarity walk*" na ang ginhiwat ni Arroyo kag iya mga idu-ido, lakip ang ginhimo sa Malacañang sadtong Pebrero 19. Sadtong Pebrero 25, ika-22 anibersaryo sang EDSA 1, nagmartsa ang tanan nga mapunpon nila nga upisyal sang militar kag pulisya upod sanday AFP Chief of Staff Gen. Hermogenes Esperon kag Philippine National Police (PNP) Director General Avelino Razon, Jr. halin sa People Power Monument tubtub sa Camp Aguinaldo sa EDSA agud ipakita ang ila kuno nga pag-sunod sa *chain of command*.

Agud kontrahan naman ang mga rali nga anti-Arroyo nga gi-

napasakupan sang nagapadaku nga numero sang pumuluyo, ginbayan sang kampo ni Arroyo ang pila ka konseho pangbarangay agud paguwaon nga rali nga maki-Arroyo. Sadtong Pebrero 28-29, kadungan sang daku nga paghulag sa Makati may sanghakup nga peke kag ginbayan nga mga tagasuporta ni Arroyo nga nagrali sa Welcome Rotunda.

Bilang paghatag konswelo sa mga ginabisita niya nga komunidad, “nagbuhat-sa-kaluoy” si Arroyo. Nagpanagtag siya sang mga delata kag Philhealth cards sa Calocan City sadtong Pebrero 22. Amo man ang ginhimo niya sa Sta. Rita, Bulacan sadtong Pebrero 29.

Peke nga testigo kag dugang nga mga kabutigan. Sari-sari nga istorya kag pagpanamad-dungog ang ginpaguwa ni Arroyo agud musingan ang kredibilidad ni Rodolfo Noel “Jun” Lozada Jr. Lakip diri ang pagtuhaw ni Erwin Santos, anay tinawo ni Lozada sa Philippine Forest Corporation (Philforest). May hibi-hibi pa si Santos samtang ginaakusahan niya si Lozada sang mga kagarukan sa Philforest. Ginkadlawan sang madamu ang testimonya ni Santos bangud masnahon nga Malacañang ang naghimo sang iskrip. Wala sang nainto si Santos. Wala gani siya naimbitahan nga magtestigo sa Senado bangud sa indi mapatihan niya nga testimonya.

Sadtong Pebrero 12, ginreyd sang National Bureau of Investigation ang upisina ni Lozada sa Philforest sa Taguig City agud magpatuhaw sang ebidensya kag maglubid sang kabutigan halin sa makuha nga mga papeles sa iya upisina.

Sa pagbanta nga makahatag sang kaathagan bahin sa isyu sang proyektong NBN, nagpa-interbyu sa dzRH si Arroyo sadtong Pebrero 23. Pero labi lamang siya nga natum-ok sang hambalon niya nga ginaugyunan niya ang proyekto bisan nahibal-an niya nga may “anomalya” ang kontrata. Nahibal-an

lang kuno niya ang “anomalya” isa ka gab-i antes ang pirmahanay sa kontrata gani alang-alang nga kanselahon ang proyekto. Masunod nga adlaw, namarasman sang rehimen nga nakapalain pa ang ginhimo nga pag-ako ni Arroyo sa radyo kag pilit ini nga ginpangin-wala sang iya mga tagapamaba agud mabawi ini.

Itom nga propaganda. Nagpalapag sang itom nga propaganda ang rehimen agud pakagamayon ang protesta. May ara nga hambalon sini sa Metro Manila lamang ang mga protesta bisan lapnagon kag dalagku ang mga paghulag sa mga prubinsya kag sa guwa sang pungsod.

Pilit kaayo nga ginapaguwa nila nga mabaskog ang banggianay sa sulod sang kahublagan pagpatalisik bisan nga mas matimbang ang paghiliusa sa sulod sini batuk kay Arroyo.

Nagapadayon man ang paglubid nila sang indi mapatihan nga istorya nga magapangamo kuno sa rali ang Bag-ong Hangaway sang Banwa ukon ang bandido nga grupong Abu Sayyaf bisan nga sa presensya sang binatayon nga militar kag pulis nga handa sila nga magsabwag sang gamo anuman nga oras nga mapeligro sa pwesto si Arroyo.

Nagakurog sa kahadlok, pagsabwag sang kahadlok. Nahadlok na gid si Arroyo sa kada testigo batuk sa iya gani nga tumbasan niya ini sang pagpangharas kag pagpamigos.

Ginpalapad kag ginhugot ang pagpanilag sa mga nagapakamala sa rehimen. Ginbutangan sini sang *surveillance camera* ang atubang sang La Salle kon sa diin nagdangup subong si Lozada kag iya pamilya. Sadtong Pebrero 28, namahug ang Malacañang sa mga estudyante sang Polytechnic University of the Philippines nga may bomba nga magalupok diri sa adlaw sang paghambal ni Lozada sa

isa ka porum didto. Wala gihapon sini mapunggan ang mga estudyante nga ululupod nga nagpakita sang suporta kay Lozada kag magpahayag sang kaakig sa rehimen.

Sobra-sobra ang pagdeploy sini sang militar kag pulisya sa kada rali, ilabi sadtong Pebrero 29. Ginpagguwa man ang mandu nga *no fly zone* ang Makati sadtong adlaw nga ina agud indi makuhaan sang bidyo ukon litrato ang aktwal nga kadakuon sang mga nagtambong sa rali. Gin-abangan man ang mga komboy sang mga raliyista halin sa mga prubinsya.

Sa adlaw sang daku nga rali, nagakurog nga naghunong si Arroyo sa Camp Crame sa sulod sang tatlo ka oras kag hugot nga ginabantayan sang mga matag-as nga upisyal sang militar kag pulisya, upod ang iya kabinete. Naghalin lamang si Crame si Arroyo sang magpinauli na ang mga raliyista.

Sadtong Marso 4, ginpaaresto niya ang siyam nga aktibista nga nagrali sa tunga sang iya palaguwaon sa Laguna. Sining gab-i sang Marso 6, mapintas nga ginbungkag ang kubay sang masobra 1,000 mamumugon halin sa Southern Tagalog nga nagarali sa atubang sang upisina sang DOLE sa Intramuros, Maynila. Tatlo nga raliyista ang inaresto, 13 ang napilasan kag anum pa ang indi makit-an matapos ang maduguon nga dispersal

Nagalala nga krisis. Samtang, ang nagadaku nga presensya sang militar sa Metro Manila patimaan sang mabaskog na nga paglala sang krisis sa Pilipinas, suno sa International Crisis Group (ICG), isa ka organisasyon nga nagatuon sa nagatipon nga krisis sa kalibutan. Ginatapalan sang rehimen ang kuno mga pahidut nga asasinasyon agud imilitarisa ang nasyunal nga kabisera. Ang matuod nga bunga ini sang pagsingki sang mga protesta nga anti-Arroyo sa National Capital Region. **AB**

Pagpanuhol sa ZTE, labi nga nagahayag

Samtang nagadugay ang imbestigasyon bahin sa maanomalya nga proyektong NBN-ZTE, labi nga nagatuhaw ang direkta nga pagkau-mid diri sang magtiayon nga Gloria at Mike Arroyo.

Sining Pebrero 26, nagtuhaw ang bag-o nga testigo nga si Dante Madriaga, anay konsultant sang ZTE. Suno kay Madriaga, mismo ang mga Pilipino nga kasosyo sang ZTE sa pagpamuno ni anay COMELEC Chairman Benjamin Abalos, ang nagabaton sang mga suhol halin sa ZTE kag ginailigan sang kikbak pakadto sa mag-asawa nga Arroyo. Lakip sa grupo nga ini si Leo San Miguel, ang nagkuha kay Madriaga para sa proyekto.

Ginpaambit kuno ni San Miguel kay Madriaga nga ang suhol sa mga upisyal sang gubyerno ginhatag sa tatlo ka hulugan. Ang una, siling niya, amo ang \$1 milyon nga ginhatag sadto pa nga Agosto 2006 sang umpisahan ang paghim-os sang proyekto. Ang ikaduha amo ang \$10 milyon nga ginhatag matapos maaprubahan sang NEDA ang kontrata sadtong Marso 2007. Katunga kuno sini nagkadto sa magtiayon nga Arroyo. Ang ikatlo amo ang \$30 milyon nga ginhatag matapos saksihan ni Gloria Arroyo ang paglagda sang kontrata sa Boao, China sadtong Abril 2007. Ang kantidad nga ini ginamit nga panggasto kag pahamham sang rehimeng Arroyo sadtong eleksyon 2007.

Bangud sa patung-patong nga mga kikbak, naghabok nga naghabok ang balor sang kontrata halin \$50 milyon pakadto \$329 milyon, kon sa diin masobra \$170 milyon ang nakapain sa mga suhol.

Ginbuyagyag man ni Madriaga ang pagpapel diri ni Mike Defensor, anay *chief of staff* sang Malacañang, para kuno siguruhon ang interes sang magtiayon nga Arroyo sa mga transaksyon sang proyektong NBN-ZTE.

Ginalauman nga labi pa nga paglig-unon ang testimonya ni Madriaga sa nakatalana nga pagtuhaw sang isa pa ka testigo nga suno kay Sen. Panfilo Lacson ang may direktang impormasyon bahin sa pagbaton sang kwarta halin sa ZTE.

Samtang, ginbalibaran sang Senado ang panugyan sang Korte Suprema bahin sa pag-atubang sang anay NEDA Chairman Romulo Neri sa mga pagbista sang Senado. Si Neri, isa sa mga nagbuyagyag sang pagkadalahig ni Jose Miguel "Mike" Arroyo sa maanomalya nga kontratang NBN-ZTE, temporaryo nga wala mag-atubang sa Senado samtang ginabista sang Korte Suprema ang petisyon niya bahin sa nagakadapat nga sakup sang *executive privilege*. Sandig sa pribilehiyo nga ini, indi pwede ipaambit sang sin-o man nga upisyal sang gubyerno ang anuman nga pagsugilanon


nila sang presidente.

Suno sa panugyan nga kasugtan sang Korte Suprema sining Marso 4, samtang obligado nga magtambong si Neri sa mga pagbista sang Senado para magtestigo bahin sa tanan nga nahibal-an sa korapsyon kag suhulan sa kontratang NBN-ZTE, likawan naman sang mga senador nga magpamangkot sa iya bahin sa mga masunod: Kon ginkalkal pa bala sang presidente ang kontrata, kon ginmandu bala ni Arroyo nga himuon nga prayoridad sang NEDA ang kontrata sa ZTE kag kon ginmandu bala ni Arroyo ang pag-aprubar sa proyekto bisan ginreport sa iya ang tuyo nga pagpahamham kay Neri kaangot sini.

Wala ini gin-ugyunan sang mga senador kag gin-insister nila kag sang eksperto sa layi nga indi pwede nga gamiton ang amo nga pribilehiyo agud tabunan ang krimen, kag indi nagakadapat limitahan ang sakup sang mga mahimo ipamangkot sa testigo.

Samtang, bangud sa kabaskog sang mga pagpakamalaut ginpahayag sang Malacañang nga indi na kuno paluntaron ang Executive Order 464 nga nagadumili sa mga upisyal sang gubyerno nga magtambong sa mga imbestigasyon sang Kongreso nga wala sang permiso halin sa presidente. Napilitan man si Arroyo nga bawion ang Memorandum Circular 108 nga nagau-nod sang iligal nga mga probisyon nga ginapabasura sang Korte Suprema sadtong 2007. Sa idalum sang MC 108, nagpanaug sang restriksyon ang Malacañang sa mga mahimo pagahambalan nga imbestigasyon sang mga myembro sang ehekutibo. Sa pihak sang pagbawi nga ini, padayon gihapon ang paglikaw sang rehimen sa mga pagbista kag pagpatambong sa mga imbestigasyon ang mga upisyal sang gubyerno kag wala-tuo gihapon ang mga pagbinu-tig sini.

AB





Militar inambus sa Samar kag Davao, detatsment sang PNP, nireyd sa Negros

Nagapadayon ang paglunsar sang mga yunit sang Bag-ong Hanga-way sang Banwa (BHB) sang mga aksyong militar sining ulihi nga bahin sang Pebrero kag una nga bahin sang Marso batuk sa mga armadong gaway sang reaksyunaryong estado.

Marso 3. Ginlambatan sang isa ka yunit sang BHB ang isa ka pla-tun sang 46th IB sa Barangay Pa-nge, Motiong, Samar. Apat ka sul-dado ang napatay kag tatlo ang na-pilasan, lakip si 2Lt. Leonard Orba-se nga kumander sang yunit. Pakad-to ang nasambit nga yunit sang AFP sa katambi nga baryo agud magres-ponder sa pagsalakay sang BHB sa isa ka balay sang pulis didto.

Marso 2. Sinalakay sang mga pwersa sang Pulang Diwata Com-mand ang detatsment sang CAFGU sa idalum sang 23rd IB sa Hinapu-yan, Surigao del Sur. Napatay sa reyrd si Cpl. Jaire Jajuri nga nagaak-to nga kumander sang CAFGU diri.

Marso 1. Inambus sang mga gerilya ang isa ka yunit sang mili-tar sa Sityo

Havana, Bara-ngay Catigan, Toril, Davao City. Tat-lo ka

suldado ang napatay kag anum nga iban pa ang napilasan.

Natabo ang paglambat isa ka adlaw makaligad nga maghatag sang seguridad ang tropa sa seremo-nya kon sa diin nanumpa sang ka-tampad sa gubyerno ang kuno 300 *rebel returnee* sang Catigan. Pabalik ang mga suldado sa ila detatsment sa Barangay Bacatan sang lambatan sila sang mga Pulang hangaway.

Pebrero 29. Ginreyd sang lima ka Pulang hangaway ang de-tatsment sang Philippine National Police (PNP) kag dinisarmahan ang duha nga katapu sang Special Civi-lian Armed Auxillary (SCAA) sa bay-bayon nga baryo sang barangay Vi-to, Sagay City sa Negros Occiden-tal. Nakalumbos lamang ang duha ka pulis agud magpanyapon kag na-

bilin ang duha ka elemento sang SCAA sang sala-kayon ang Community

Police Assistance Center (COMPAC) sang mga katapu sang Roselyn Jean Pelle Command (RJPC) sang BHB-Negros.

Suno kay Ka Esther Estrella, ta-gapamaba sang RJPC, naagaw sa COMPAC ang duha M14, duha kal. .38 pistola, mga *cellphone*, maga-sin kag bala kag iban pa nga gamit militar. Makaligad ang 10 minutos, nadula nga daw bukal ang mga Pu-lang hangaway sa madamul nga ta-gabaryo. Nagbilin sila sang mga polyeto nga nagakundenar sang subong nga rehimen.

Pebrero 27. Isa ka armalayt kag isa ka kal. .22 nga rebolber ang nakumpiska sang mga Pulang hangaway sa balay sang isa ka li-der sang CAFGU sa Barangay San Francisco, Panabo City, Davao del Norte. Wala sa iya balay ang lider sang paramilitar sang salakayon ini sang mga Pulang gerilya.

Pebrero 26. Napatay ang isa ka elemento sang CAFGU sang lam-batan sang mga hangaway sa ida-lum sang Nonito Aguirre Command sang BHB-Eastern Panay ang iya ginasakyan nga dyip sa Barangay Putian, Cuartero. Katapu sang 6th CAFGU Company nga nakadestino sa Maayon, Capiz ang nasambit nga elemento. Ginhatagan war-ning naman sang mga hangaway ang upod niya nga utod nga ele-mento man sang CAFGU.

Pebrero 21. Dinisarmahan sang 20 pwersang gerilya ang isa ka yunit sang Civilian Volunteers' Organization (CVO) sa Barangay Poblacion, Montevista, Compostela Valley. Suno sa panugod nga re-port, nakumpiska ang tanan nga pusil sang mga paramilitar nga gi-nalakipan sang isa ka rebolber nga



.357, pistola nga kal. .45, isa ka *shotgun* kag isa ka *handheld radio*.

Sa adlaw man nga ini, duha ka suldado sang AFP ang napatay kag walo pa ang napilasan sa duha separado nga pag-engkwentruhanay sang BHB kag elemento sang Philippine Army sa mga banwa sang San Jose kag Magsaysay, Mindoro Occidental sadtong ikaduha nga simana sang Pebrero.

Pebrero 20. Inambus kag napatay sang isa ka yunit isparo sang Celso Minguez Command sang BHB-Sorsogon sa Zone 1, Bulan, Sorsogon si Jamil Borrás Jaimalin, isa ka ahente sang Intelligence Service of the Armed Forces of the Philippines (ISAFP). Responsable si Borrás sa pagpatay kanday Rei Mon Guran,

isa ka lider-estudyante kag Manny Botolan, isa ka drayber sang traysikol sa Bulan. Tagatukod man siya sang Barangay Intelligence Network sa sulod kag guwa sang Bulan.

Pebrero 19. Nagaooperasyon ang mga elemento sang 23rd Division Reconnaissance Company sang Philippine Army sa Sityo Bantulaw, Barangay Paclolo, Magsaysay, Occidental Mindoro sang lambatan sila sang mga pwersang gerilya sang BHB. Masunod nga adlaw, Pebrero 20, napatay ang isa ka elemento sang Charlie Company sang 80th IB

sa pagpakig-engkwentro sa mga pwersang gerilya sa Sityo Quintal, Barangay Murtha, San Jose sa pareho nga prubinsya.

Pebrero 17. Dinisarmahan sang mga pwersa sang Alejandro Lanaja Command sang Southern Mindanao Region ang isa pa ka yunit sang CAGU sa Barangay Kibaguba, Laak, Davao del Norte. Naagaw sang mga hangaway ang duha *shotgun*, duha Garand kag isa ka M203 *grenade launcher*. Wala makabato ang mga nasorpresa nga paramilitar. AB

Misengkwentro sang mga yunit sang AFP sa Bikol

ANUM ka suldado ang napatay kag duha ang napilasan sa misengkwentro nga natabo sa tunga sang 8th Scout Ranger Company kag 3rd Scout Ranger Battalion sa Irosin, Sorsogon sining Pebrero 25.

Agud matabunan ang madugon nga misengkwentro, ginpaguwa sang AFP nga isa ka engkwentro sa tunga sang AFP kag BHB ang natabo. Ginpaguwa sang AFP nga duha ka hangaway sang BHB ang napatay kag duha ka M16 ang nakumpiska.

Suno sa Celso Minguez Command sang BHB-Sorsogon, pakadto pa lang sa *ambush site* ang isa ka tim sang mga isnayper sang BHB sang magluntad ang lukpanay. Tatlo ang gilayon nga naigo sa mga suldado.

Maabtik nga nakalikaw ang mga isnayper sang magbugso ang ikaduha nga serye sang lukpanay sa tunga sang duha ka yunit sang militar. Matapos ang inaway, patago na lang nga hinakot sang mga suldado ang ila mga kaswalti. AB

Kaso sang masaker sa Sulu, igapasaka sa UN

Igapasaka sang Suara Bangsamoro o Suara kag Isang Moro Islamic Liberation Front sa United Nations Human Rights Council ang makangingidlis nga masaker sang mga elemento sang Special Warfare Group sang Philippine Navy kag Light Reaction Company sang Philippine Army sa walo ka sibilyan sa Ipil, Maimbung, Sulu sadtong kaagahon sang Pebrero 4. Ini matapos absweltuhon sang AFP ang mga suldado nga responsable sa masaker.

Suno kay Amira Lidasan, pungodnon nga pangulo sang Suara, indi mapatihan ang resulta sang imbestigasyon sang AFP nga nagasingling nga may natabo nga engkwentro sa tunga sang militar kag mga elemento sang Abu Sayyaf. Wala pa man sang imbestigasyon idineklara na sang AFP nga lunsay mga elemento o tagatago sang Abu Sayyaf ang mga biktima. Ginliwat lamang ini sang AFP sang ianunsyo sining Pebrero 28 sang Judge Advocate General's Office sang Western Mindanao Command ang pag-abswelto sang mga naumid nga suldado matapos ang kaugalingon nga imbestigasyon nga ginhiwat kuno sang militar.

Nauna na nga nag-imbestiga ang Commission on Human Rights (CHR) kag ginsiling sini nga indi matuod nga natabo ang engkwentro sa Maimbung kag wala sang bisan isa ka elemento sang Abu Sayyaf sa mga biktima. Suno sa CHR, sinalakay sang mga tropa ang isla nga baryo sang Maimbung kag ginpangluthang ang mga residente sa pihak sang ila pagpakitluoy kag pagsiling nga mga sibilyan sila.

Ang duha ka suldado nga napatay kag lima ang napilasan sa insidente resulta sang *misencounter* sa tunga sang mga elemento sang AFP.

Gin-ulan sang grabe nga kundenasyon ang banggian nga imbestigasyon sang AFP. Bangud diri, napilitan si Lt. Gen. Nelson Allaga, hepe sang Western Mindanao Command, nga hambalon sining Marso 2 nga pang-umpisa pa lamang sang imbesigasyon kag indi pa lubos nga gin-abswelto ang mga naumid nga suldado. AB



Jonas Burgos, ara sa Order of Battle ng AFP

GINPAGUWA sining karon lang ni Editha Burgos, iloy sang nadula nga aktibista nga si Jonas Burgos, ang isa ka sekreto nga report sang AFP nga nagasiling ara sa Order of Battle (OB) sang AFP si Jonas Burgos amo nga gindukot ini.

Suno kay Ginang Burgos, may naghatag sa iya sang impormasyon halin sa indi magpakilala nga suldado sang 56th IB sang Philippine Army nga nakabase sa Norgazaray, Bulacan nga si Jonas Burgos ginaspetsahan nga pinuno sang In-

telligence Department sang Bag-o nga Hangaway sang Banwa sa prubinsya sang Bulacan kag nagatago sa pangalan nga Ka Raymond, Ka Ramon o Ka Simon.

Ara kuno sa OB sang AFP sadto pa man nga Marso 17, 2007. Ginsiling man sa report sang 56th IB nga mga militar ang nagkudot sa iya sa Ever Gotesco sa Quezon City sadtong Abril kag ginpaidalom si Jonas Burgos sa *tactical investigation* kag ginbutang sa report nga *neutralized* ukon ginpatay na.

Gin-umid man kuno ang asawa ni Jonas nga si Marian. Ang iya pakaisa nga nakaagi sang pagpangipit halin sa mga nagpakilala nga myembro sang Commission Human Rights para hibal-on kon diin ang asawa kag anak ni Jonas.

Ginbuyagyag ini ni Ginang Burgos sa Court of Appeals sa padayon nga pagbista sang ginpasaka nga petisyon para sa *writ of amparo* sang pamilya Burgos sa korte. Nagkadto sa US si Ginang Burgos agud dal-on ang kampanya didto para kay Jonas.

Mga proyekto sang gubyrno, ginapaimbestigahan

GINAPAIMBESTIGAHAN sang Bayan Muna ang mga proyekto sang gubyrno nga ginopondohan sang mga utang pangluwas. Ginainsister ni Rep. Teddy Casiño nga dapat repasuhon sang Kongreso sa pangunguna sang Congressional Oversight Committee on Foreign Funded Projects ang mga proyekto nga ginapondohan sang Overseas Development Assistance o ODA para hibal-on kon ano nga mga anomalya ang nagaputos sa mga ini. Matapos ini nga dali-dali nga kanselahon sang rehimen Arroyo ang 11 ka proyekto nga ara sa amo nga katagorya.

Ang mga ginasambit nga mga proyekto amo ang Angat Water Utilization and Aqueduct Improvement Project Phase 2 sa Metro Manila nga nagabalor P5.75 bilyon; Bataan Manila Pipeline Project, P7.2 bilyon; LRT line 2 Phase 2 Extension (Santolan tubtub Masinag, Antipolo), P10.33 bilyon; LRT line 1 North Extension, P5.98 bilyon; Cyber-education Project, P26.48 bilyon; Mainline Southrail Project Phase 1A, P15.30 bilyon; LRT line 1 South Extension (Pasay tubtub Bacoor, Cavite), P15.3 bilyon; New Communication, Navigation, Surveillance and Air Traffic Management Systems Development Project in North Luzon, P2.64 bilyon; Regionalization of Mental Health Services in Luzon Urban Beltway, P1.32 bilyon; Redevelopment of Tacloban Airport Development Project Phase 11, P1.12 bilyon; kag pati ang kontruksyon sang mga hulot-klasehan sang mga boluthuan nga elementarya kag hayskul, nga nagabalor sang P45.67 milyon. Ang tanan nga mga ini nagabalor sang P104 bilyon.

Nagahana nga krisis sa pagkaon

LABI nga mangin lapnagon ang kagulutmon sa Pilipinas kag madamu nga iban pa nga imol nga pungsod sa nagahana sa paglupok sang malubha nga krisis sa pagkaon subong nga tuig.

Suno sa mga ekonomista, isa sa mga paktor sang pagtimbuok sang presyo sang madamu nga mga basehang pagkaon amo ang pagkausong sang *biofuels* ukon panggatong nga nagahalin sa mga pananom. Ang mais, halimbawa, nga ginagamit sa pagmanukpaktura sang *ethanol* nga nag-angkon sang 88% pagtaas sa presyo sa pangkalibutanon nga merkado—bagay nga nakapataas man sa presyo sang karne nga baboy kag manok. Ang mais ang isa sa pangunahon nga sangkap sang ginapakaon sang mga ginasagod nga sapat.

Upod gihapon sa iban pa nga mga pagkaon nga nagtimbuok ang presyo sa pangkalibutanon nga merkado amo ang langis sang niyog (96%), bugas (54%), *soybean* (85%) kag trigo (148%). Bangud diri lauman nga ang matayog nga pagtaas sang presyo sang mga nagagamit sang trigo kag mantika (pareho sang tinapay). Mahimo mabatyagan na ang epekto sang krisis sa Pilipinas subong nga Marso.

Dugang pa nga paktor ang paghabok sang presyo sang krudong langis asta \$103 kada bariles, pinakamataas nga presyo nga narekord sining sa nagligad nga 30 ka tuig.

Ang pagtaas sang mga presyo sang pagkaon sigurado nga magpalala pa sa makaluluoy nga kahimtangan sang tuman kadamo nga imol sa Pilipinas. Suno sa estadistika sang National Statistical Coordination Board, nagtaas halin 24.4% sadtong 2003 pakadto 26.9% sadtong 2006 ang porsyento sang mga imol sa Pilipinas. Pero kon kwentahon, nagalab-ot sa 80% sang pumuluoy nga Pilipino ang masiling nga imol bangud sa lapnagon nga kawad-on sang trabaho kag nakalansang nga sweldo.

Pilipina, ginhimuslan sang suldado nga Amerikano sa Japan

ISA ka migrante nga mamumugon nga Pilipina ang ginhimuslan sang isa ka suldado nga Amerikano sa Okinawa, Japan sadtong Pebrero 18. Nagpasaka na sang kaso ang ginlugos nga Pilipina batuk sa suldado nga Amerikano kag subong ara siya sa proteksyon sang mga pulisya sa Okinawa.

Ang balita bahin sa pagpanghimulos liwat nga nagpadabdab sa kaakig sang pumuluyo nga Pilipino. Sunod-sunod nga mga protesta ang ginlunsar sang mga grupong kababaihan, sa pangunguna sang Gabriela, sa atubang sang embahada sang US para pakamalauton ang paghimulos kag ipamilit ang pagtapos sang presensya sang militar sang US sa Pilipinas kag iban nga pungsod sa Asia. Ginkundenar man

sang mga ini ang kawad-on sang aksyon sang rehimeng Arroyo sa kaso. Kon indi maid-id nga bantayan, pat-ud nga takpan lamang sang papet nga rehimen ang suspek, pareho sang gintuyo sini nga himuon sa kaso sang ginlugos nga Pilipina sa Subic sadtong 2006.

Kadungan sini, ginpasar sang 52 ka babayeng kongresista ang isa ka resolusyon para suportahan ang biktima sa pagpasaka sang kaso batuk sa suldado nga Amerikano. Siling nila, dapat tagaan sang gubyernong Arroyo sang bulig nga legal kag pinansyal ang biktima tubtub matapos ang kaso. Ginapamilit man nila nga dapat maghimo sang protestang diplomatiko batuk sa US.

Mabaskog ang kaakig sang mga Hapones sa presensya sang baseng

militar sang US kag ang daku numero sang mga suldado nga Amerikano sa Japan. Ang paghimulos sa Pilipina sa Okinawa natabo pila ka adlaw matapos maglupok ang kaso sang paghimulos sang isa pa ka suldado nga Amerikano sa 14-anyos nga estudyanteng Haponesa. Sa grabe nga kaakig sang pumuluyo didto, nagpatuman ang lokal nga gubyerno sang *curfew* kag restriksyon sa mga suldado nga Amerikano sa lugar. Nagbutang man sila sang mga *surveillance camera* sa mga *gate* sang base para imonitor ang hulag sang mga suldado. Madugay na nila ginapalayas ang mga ini bangud sa sunod-sunod nga mga kaso sang paglapas sang tawhanong kinamatarung kag paglapak sa soberanya sang Japan.

Tunay nga gastos sa gera sa Iraq ;\$ 3 trilyon

NAGLAB-OT na sa \$3 trilyon ang nagastos sang US sa lima ka tuig sini nga pagpanakop sa Iraq ukon napulo ka beses kumpara sa upisyal nga mga report, suno sa isa ka pagtuon nga ginhimo ni Joseph Stiglitz, anay *chief economist* sang World bank.

Siling ni Stiglitz, nagdaku ang gastos bangud sa tuman kadaku nga kontrata nga nagabalor sang

\$193 milyon nga nakuha sang kumpanyang Haliburton nga malapit kay Bise Presidente Dick Cheney; tuman kadaku nga sweldo sang mga ginkontrata nga pribadong pwersang panseguridad (\$400,000/tuig) kumparar sa sweldo sang mga suldado (\$40,000/tuig); kontrata nga sobra ang bayad pareho sang pagpapintura nga pwede himuon sang mga Iraqi sa balor nga \$5 milyon pero naglab-ot sa \$25 milyon bangud kinontrata ini sang isa ka kumpanyang US. Daku man ang gasto sa pagpabulong,

pagtatap kag pagpalubong sa mga kaswalti nga wala gina-isip nga badyet sang militar kag ginaupod sa mga departamento pareho sang Department of Health.

Mas daku pa ini kon iupod ang gatos sa pagtaas sang presyo sang langis. Lima ka tuig pagkatapos sang pananakop, wala pa gihapon napuslan sang US ang langis sang Iraq. Indi pa upod sa kwenta ang gastos sa pagtatap sa mga internal kag eksternal nga nga bakwit sang Iraq; gasto sa pagpabulong sang mga kaswalti nga Iraqi, kag ang madugayan nga rehabilitasyon sang mga kaswalti nga Amerikano kag Iraqi dulot sang pagpamomba.


Kinahanglan mag-utang ang US sa iban nga pungsod agud pondohan ang teroristang gera batuk sa Iraq. Nagalab-ot na ini sa \$1 trilyon nga kadam-an inutang sa China.

Samtang, suno naman sa isa ka pagtuon sang isa ka ekonomista sang UK Defence Department, nag-

lab-ot sa lima ka bilyong euro (\$7.5 bilyon) ang upisyal nga nagasto sang UK sa gera asta 2006 kag ginabanta nga nadugangan pa ini sang \$1 bilyon sadtong nagligad nga tuig.

Raul Castro, bag-o nga presidente sang Cuba

NAPILIAN bilang bag-o nga presidente sang Cuba si Raul Castro sadtong Pebrero 25. Ginpili si Raul Castro sang National Assembly sang Cuba pagkatapos pormal nga magresign bilang presidente si Fidel Castro. Halin sang magbalatian si Fidel sadtong 2005, si Raul na ang nagpungko bilang presidente sang Cuba kadungan sang pagka-hepe sang Armed Forces sang Cuba. Si Raul Castro, nga manghod ni Fidel, isa man ka beterano sang rebolusyon sang Cuba.

**ANG****Bayan**

Pahayagan ng Partido Komunista ng Pilipinas
Pinapatnubayan ng Marxismo-Leninismo-Maoismo

Edisyong Hiligaynon
Tuig XXXIX No. 5
Marso 7, 2008
www.philippinerevolution.net

Editorial

Padabdabon ang paghimakas sang pumuluyo agud pukanon ang rehimeng Arroyo

Labaw na ang kaakig kag pagsikway sang pumuluyong Pilipino sa rehimeng US-Arroyo. Napuno na gid sila kag nagakaakig sa patung-patong nga mga kaso sang korapsyon kag pagbinutig sang rehimeng Arroyo kag sa sobra sini nga pagpaantos kag pagpamigos sa ila.

Nagadasig ang kumpas kag paglapad sang kahublagang protesta sa bilog nga pungsod. Umpisa sa mga nagapadaku nga rali nga ginlunsar sa Makati sadtong Pebrero 15 kag 29, adlaw-adlaw nga nagalapnag sa nasyunal nga kabisera kag sa nagkalain-lain nga bahin sang pungsod ang pagbuhos sang kolektibo nga kaakig sang pumuluyo. Ang mga ini patimaan sang mabaskog nga pagsikway sang pumuluyo nga Pilipino sa rehimeng US-Arroyo kag kahandaan nila nga baktason ang dalan sang militante nga paghulag para tapuson ang ginakangil-aran nila nga rehimen.

Samtang nagaibwal ang kahublagang protesta sa bug-os nga pungsod, nagadamu ang nagatuhaw nga mga kagarukan, kabutigan kag kapintas sang nagaharing rehimen. Luwas sa pagkabuyagyag sang anomalya sa proyektong NBN-ZTE, nahayag man sining uli-

hi ang antinasyunal nga kasugtanan nga ginsudlan sang rehimen nga pagtugot sa China sang eksplorasyon sang langis sa Spratlay Islands kabaylo sang bilyon nga pautang. Antes ini, nahayag na ang patungpatong nga kaso sang korapsyon, lakip ang mga ginpangawat sang pamilya Arroyo halin sa proyektong IMPSA-Caliraya, Macapagal Boulevard kag madamu nga iban pa.



***Mga tampok
sa isyu nga ini...***

**Nagabuwelo nga mga
protesta** PAHINA 3

Nagapalak si Arroyo
PAHINA 4

**Ambus sa Samar
kag Davao, reyd
sa Negros** PAHINA 7

Mga instruksyon sa paglilimbag

1. Ang **sinundang pahina**, na eksaktong kopya ng pahina 1 maliban sa mas mapusyaw ang *masthead* o *logo* ay para sa mga gumagamit ng *mimeo machine* o naglilimbag sa paraang *v-type*. Idinisenyo ito para hindi madaling makasira ng istensil.

2. Pag-*print* sa istensil:

- a) Sa *print dialog*, i-check ang **Print as image**
- b) Alisin ang *check* sa **Shrink oversized pages to paper size**
- k) I-click ang **Properties**
- d) I-click ang **Advanced**
- e) Tiyaking naka-set sa **100%** ang **Scaling**
- d) Ituloy ang pag-*print*

3. Hinihikayat ang mga kasama na ipaabot sa patnugutan ng *AB* ang anumang problema kaugnay ng paglilimbag sa pamamagitan ng *v-type*. Magpadala ng *email* sa *angba-yan@yahoo.com*